

Мерейлі жас

СЕКСЕННІҢ ДЕ СЕНГІРІНЕН АСЫҢЫЗ

Жетпіс жас деген айтып отырсақ, үлкен асулар асқан жас деп ойлаймын. Кейде жетпіс емес, елу жасқа жетпей өмірден өтіп кеткендерді көреміз.

Жетпіс жасына дейін талай асуларды бастан кешірген, басынан өткен қиыншылыққа төтеп берген, жамандық көрсе, жасымай, жақсылық көрсе, тасымай жүрген бүгінде аяулы әже атанып отырған «Мың бір түн» деп аталатын араб әдебиетінің орта ғасырдағы классикалық шығармасындағы ақылды әйел Шаһризада Ашимқызы қыркүйек айында 70 жасқа толып отыр.

Барлық жұрт «Шура» атайтын Шаһризада еліне елеулі, жұрттың қалаулы. Уәзірдің қызы Шаһризада әйел қауымын жазалаған. Шаһрияр патшаға мың бір түн қызықты әңгіме айтып, сол арқылы ажал сағатын ұзартқанын білеміз. Ал біздің Шаһризада әжеміз адамдарға үнемі жақсылық сыйлап жүреді. Әкесі Ашим Арзиев ауданның партия комитетінің бірінші хатшысы болса, анасы Тұрсынбүбі талай қасиетті, әдемі дастарқанын жайған, он саусағынан өнері тамған, елді ерекше қадірлейтін адам болған. Ашим ақаның үйінде талай мемлекет қайраткерлері болып, Тұрсынбүбі хәдәнің қолынан дәм таққан. Ел жұртқа сыйлы, өзім жақсы көретін Дінмұхамед Ахметұлы Қонаев, еліміздің тұңғыш президенті Нұрсұлтан Әбішұлы Назарбаев осы үйден қонақ болып, хәдәмізге

алғыс айтқан. Осындай инабатты, ақылды адамдардан үлгі алған Шаһризада Ашимқызы жақсы адам. Мақтауға тұрарлық. Шаһризада жары Расул екеуі бір қыз, екі ұлды дүниеге әкелді. «Бір кем дүние» Расул өмірден ерте кетті. Осы қайғыны бауырларының өмірден ерте кетуі, өмір мен өлімнің арасындағы әр түрлі жағдайды Шаһризада қара нардай көтерді.

Жоғары оқу орнын бітірген соң білім саласында, ішкі саясат бөлімінде, мәдениет саласында өзінің еселі еңбегін көрсетті. Еңбегі елеусіз қалғаны жоқ, марапаттары жеткілікті. Шаһризаданың достары өте көп. Кез келген ұлт өкілімен тез тіл табысып кетеді. Өз ұлтының құндылықтарын үнемі сақтап отырады. Әкесі мен шешесінен алған тәрбиесінен нәр алған Шаһризада өмірден өткен Расулды жоқтатпай, ұлын уяға, қызын қияға қондырды. Жалғыз қызы Шахсәнәм – медбике, ұлы Марс-заңгер, Руфат - жеке кәсіп иегері. Анасын ешуақытта жерге қаратпайды, осы үш баладан өрбіген немерелер ортасында Шаһризада шалқып, жетпістің кемеліне мінді.

Шура ханым 70 жасқа дейін жеткен қайратыңыз сарқылмай, әжелердің тобында жүре беріңіз. Сіздің өміріңіздің әрбір күні жаңа Қазақстанның болашағына үлгі бола алады. Тұғырдан түспеңіз. Сексеннің де сенгірінен асыңыз.

Рая САРТОЛОВА,
Ұйғыр ауданының құрметті азаматы.



Байқау

«ҚАЗЫНА ТҮНҒАН – ҚҰТ МЕКЕН»

Қазақстанның оңтүстік-шығысы биік таулармен ерекшеленеді. Таулы аймақ десе, кімнің де болса көз алдына алдымен табиғаты шұрайлы да, шырайлы Райымбек өңірі елестері анық. Біз сөз етіп отырған Сарыжаз ауылы осы өңірде. «Сәрсенбай шыңы» аталатын алып таудың етегінде, Мұраталы мен Қоянсай сияқты таулары бар, Сарқырамадай шипалы суы бар, әрине ол-Сарыжаз ауылы. Табиғаты аса көркем, Сарыжаз ауылының ауасы-дертке шипа, суы мөлдір, жанға дауа. Осындай көркем табиғатымен көз тартатын ауылдан талай ұлы адамдар жазушы да, ғалым, мемлекет қайраткері Алтынбек Сәрсенбаев, ақындар Мінуар Әкімханов, Серікжан Қажиев, сатирик жазушы Нұртан Төлепбергенов, актер Болат Қалымбетов, спортшылар Жасұлтан Қыдырбаев, Назым Қызайбай, Тимур Спатаев сынды мақтанштары бар. Сарыжаз сияқты қасиетті топырақтан жаралған әр азамат өзін кешегі ер бабалар үрдісімен елін өзінің жақсы үлгісімен қорғауы тиіс.

Осы үрдістен жаңылмаған сарыжаздықтар ауылдық мәдениеттің түбегейлі өзгерісін, мәдени өрлеу мен жаңаша өмір жетістіктерін таныстыру мақсатында Сарыжаз ауылдық округі әкімінің ұйымдастыруымен «Қазына тұнған, құт мекені - Сарыжазым» атты байқаудың байрақты бәсекесі Сарыжаз ауылына да жетіп, Сарыжаз ауылы мен Ақбейіт ауылының орталық жазығында өткізілді.

Аудандық маслихат төрағасы Самат Мүсірбаев, маслихат депутаты Ғалымжан Мұхтарұлы, Гүлнар Арипова мен Райымбек аудандық мәдениет үйінің директоры Медет Серікұлы, арнайы Астана қаласынан келген спортшы, рекордшы, армрестлингтен әлем жеңімпазы Тимур Спатаев бастаған қонақтарға Райымбек ауданының қазақ күресінен аға бапкері Дүйсен Бозбашаев шәкірттерінің боз кілемде белдесуі, ауылшаруашылығы техникаларының көрмесі, кітап көрмесі, колөнер шеберлері мен суретшілердің көрмесі, Сарыжаз ауылының тарихы мен жетістіктері таныстырылды. Ауылшаруашылық көрмесіне Сарыжаз кәсіптік-техникалық колледжінің техникалық

жабдықтары мен студенттерінің колөнер көрмесі, «Самат», «Мұхтар», «Қалибек» шаруа қожалықтарының техникалары қойылған.

Ұлттық дәстүрлерді жаңғыртқан шара барысында келушілерді ақ жаулықты әжелер шашу шашып, қарсы алды.

Самат Мүсірбаев, аудандық маслихат төрағасы:

-Сарыжаз ауылы-ауданымыздың кіре берісіндегі үлкен ауылдардың бірі. Бұл ауылда көптеген мәдени шаралар өткізіліп тұрады, құрылыс насандары да қарқынды дамуда. Өздеріңіз білесіздер, Райымбек, Кеген аудандарындағы республи-



калық жолға 9 млрд тенге қаржы бөлінді. Сексенінші жылдары жасалған жаяу жүргіншілер жолы тозып кеткен, биыл Сарыжаз бен Ақбейіт арасындағы жаяу жүргіншілер жолының құрылысы және ауыл ішіндегі салынбай қалған көшелерге асфальт төсеу жұмыстары аяқталатын болады,- дей келе шараның негізгі мақсатымен ауылдың тыныс-тіршілігі, өндіріліп жатқан өнімдермен салт-дәстүрлеріне қысқаша тоқталып өтті.

Мерекенің негізгі бөлімінде



Сарыжаз ауылдық мәдениет үйі өнерпаздары дайындаған концерттік бағдарлама көпшілік назарына ұсынылды. «Қос ішектің бірін тарт та, бірін сәл-сәл кем бұра, нағыз қазақ қазақ емес, нағыз қазақ-домбыра». Мерекелік кештің шымылдығы қос ішекті аспаптың көмейінен төгілген күймен түрілді. Алмас Қияпен шәкірті Кәмилжан Ершат күмбірлеген қара домбыраның үнімен жырдан шашу шашып, көрерменді серпілтіп тастады. Ұмыт бола бастаған, «Есік ашар» дәстүрі сахналанып, әйгілі атбегі Рамазанов Қонысбай ақсақал көпшілікке ақ бағасын берді. Айбар Сартбаев, Бағдат Бибекөв, Сәуле Миниясова сынды күміс көмей әншілер әуелете ән салып, «Наз», «Үкілім-ай» би топтары қазақ, үнді халқының ұлттық билерін мың бұрала биледі. «Алтын алқалы» әжелер ансамблінің орындауындағы «Әриайдай» және «Сәулем-ай» әндері көрерменнің көңілін жадыратып, ерекше ризашылығына ие болды.

Сондай-ақ, көпшілікке «Темір адам» лақап атымен танымал, Сарыжаздың тумасы Тимур Спатаев айтулы шараға Астанадан арнайы келіпті. Қара күштің иесі 32 келлік

кір тасымен 25 келі тартатын семсер қылышты бір қолымен ұршықша иіріп, бар өнерін ортаға салды. Сонымен қатар, ол қалың шегені жалаң қолымен майыстырып, тұмар жасады. Оның екі жүздік екі шегені бір-біріне байлап жасайтын өрнегі- отбасының береке-бірлігінің мықтылығын білдіретін тұмар екенін айтты. «Шеге тағаны ұстайды, таға тұяқты ұстайды, тұяқ атты ұстайды, ат ер тоқымды ұстайды, ер тоқым ер жігітті ұстайды, ал ер жігіт елді ұстайды!» дейді. Сондықтан, қазақтың жігіттері шегедей мықты болайық! Осы тұмар, жұмыссыздың төрінде тұрсын! - деп Тимур Спатаев сөзін аяқтап, ауыл әкімі Сайлау Жетпісбаевқа табыс етті.

Байқау аясында ауылдарды аралап келе жатқан әділ-қазылар алқасының атынан шара соңында сөз сөйлеген Медет Серікұлы ауылдағы мәдениет саласы қызметкерлеріне алғысын жеткізе отырып, байқаудың маңызына тоқталып өтті:

-«Қазына тұнған-құт мекен» байқауы тек концертпен шектелмейді. Негізгі мақсатымыз бес саусақтай жұмылып, тату-тәтті жарасқан ауылдың тыныс-тіршілігімен танысу. «Рухы мықты елдің тәжі басында, бағы қасында»-деген Жүсіп Баласағұнның сөзі бар. Яғни, рух болмаған жерде ұлт та болмайды. Ал сол рухты көтеретіндердің бірі-мәдениет қызметкерлері,-дей келе шараға қатысқан ауыл тұрғындарына алғысын жеткізді.

Айына екі рет ұйымдастырылатын «Қазына тұнған-құт мекен» байқауы жыл соңында үздіктері анықталып, марапатталатын болады.

Дәурен ЕРМЕКБАЙ,
Райымбек ауданы.